

Pelaksanaan cukai ke atas penjualan cecair vape e-rokok


Pendekatan hentikan tabiat merokok

Kuala Lumpur: Langkah mengenakan cukai ke atas penjualan cecair vape untuk rokok elektronik adalah antara pendekatan sederhana diambil kerajaan untuk mengawal selia produk merokok yang mengandungi nikotin serta menghentikan tabiat merokok dalam kalangan rakyat di negara ini.

Perdana Menteri, Datuk Seri Anwar Ibrahim, berkata pada masa sama, kerajaan tetap tegas melarang perbuatan itu dilakukan di tempat seperti di sekolah dan Parlimen, selain meningkatkan kempen advokasi bagi memberi kesedaran bahaya merokok, terutama terhadap golongan muda.

“Kita ambil tindakan memberi kesedaran, tetapi mengambil tindakan mengharamkan nikotin, vape, rokok, itu agak drastik dan tak mampu dilakukan mana-mana negara dunia.

“Orang (masih) pilih untuk merokok, walaupun kita keluarkan kempen, sama seperti arak. Jadi sementara kita kempen mengenai kesan negatif (rokok), tetapi



Cukai ke atas penjualan cecair vape adalah antara langkah kerajaan hentikan tabiat merokok dalam kalangan rakyat.

(Foto hiasan)

kita teruskan percukaian.

“Ini sekadar untuk tidak menjadikan bahan itu tersebar luas dan murah,” katanya pada Waktu Pertanyaan Menteri di Dewan Rakyat, semalam.

Beliau menjawab soalan tambahan Datuk Dr Ahmad Yunus Hairi (PN-Kuala Langat) impli-

kasi daripada tindakan kerajaan menyahsenaraikan produk cecair dan gel nikotin yang digunakan dalam alat rokok elektronik daripada Akta Racun 1952 yang seolah menggadaikan masa depan generasi muda yang terdedah kepada ketagihan dan penyakit berkaitan rokok.

Mengulas lanjut, Anwar berkata, beliau sedar keputusan itu mendapat bantahan khususnya daripada pelbagai badan perubatan profesional dan persatuan bukan kerajaan (NGO).

“Badan profesional semuanya menentang keras soal ini, tetapi pada hemat kerajaan buat sementara ini kita sukar untuk mengharamkan, tetapi boleh meningkatkan kesedaran.

“Ada ulama yang haramkan rokok umpamanya tetapi perokok (tetap) ada. Ini masalah (sejak) ribuan tahun. Sebab itu pendekatan kita sederhana, mengenakan cukai tetapi tegas untuk melarang (misalnya) di Parlimen, sekolah. Sekatan cukup meluas ke atas masyarakat terutama orang muda, (sama ada) bagi penggunaan vape atau rokok,” katanya.

Pada masa sama, Anwar berkata, kerajaan komited untuk membentangkan rang undang-undang berkaitan kawalan produk merokok, termasuk rokok elektronik pada sidang Dewan Rakyat, Mei ini.